

欽定大清會典事例

欽定大清會典事例卷二百五

戶部

漕運

會選運軍
淮通例限

漕糧文兌
回空例限

沿途程限

會選運軍。○順治九年獲准舊例用黃快船以運貨物。設運船以載漕糧。邇年運軍苦於運糧。每多竄入黃快下。該管官嚴行清勾。○十二年獲准軍丁毋許竄入民籍。責令該管糧道分別造冊。五年一編審。儻有蒙混不清及受賄擾民者。指名題參。○康熙二年定會派運丁開下舍。餘同會領運至護衛之軍下。既係衛所內額軍。

如果殷實。卽當僉批。備弁徇庇不僉。該督撫卽指名題參。○三年定。湖廣各軍丁。不論城屯。與班營等軍。凡有殷實一併僉運。○四年題准。衛所內。僉有不法強徒。強索民間富戶。與遠年絕軍同姓者。幫貼運費。總漕督撫。嚴查究治。○九年定。僉報運丁。有衛弁巧借備運名色。訪本衛殷實餘丁百計。需索者。令各糧道嚴查。果有缺額。飭將殷實之丁。坐名僉報。既僉之後。不得妄報新丁。亦不得受賄更換。如有此弊。該督撫嚴查題參。○十九年定。運丁赤貧無賴。積年欠

糧者總漕查明革退另僉殷實之人頂運○二十二年題准運軍不許投竄別差儻有避運投旗隱漏不報者總漕即行題參○二十五年議准各省衛所運軍舊例每船自十名至十一二名不等今酌定每船額設十名各省一例僉差○二十六年題准運軍不親押運以子弟代運者定例將運軍及代運之人發邊衛充軍嗣後將該管官弁一併分別議處○三十五年覆准漕船出運每船僉軍一名其餘水手九名雇覓有身家並諳練撐駕之人充役如有濫充以致

侵欠者將僉軍不慎之官題叅○四十一年題
准江南省江淮興武二衛無贍運屯田原減駕
軍二名照舊增設○四十五年復准全漕杜欠
務在僉軍須用殷實誠厚之人僉軍之例親僉
責在糧道舉報責在衛守備用舍責在運弁保
結責在通幫衆軍一軍無保不准僉運一軍有
欠衆軍同賠○五十一年題准每年於本軍子
弟及兄弟之子再僉一人為副軍隨運如抵通
欠糧留本軍追比令副軍駕空回南如重運到
淮短少令本軍加運北上留副軍買米趕幫○

又覆准每幫十船連環保結。互相稽查。如有折乾盜賣等弊。有能出首者。酌量賞給。如隱匿不首。事發本軍照律治罪。其餘九軍一同責懲。所欠米數。即令買補運通。○又題准僉差運軍。必須千總保結。呈報衛備府佐等官驗看。加具印結。如有欠帳者。將各官一併叅處。○五十二年題准湖廣僉軍。責成衛備。其道府府佐貳官。照舊驗看加結。○五十三年題准江西省屯田。悉歸州縣管理。其僉差運軍。即責令州縣保結。○六十一年題准糧船回空。額設副軍。務令親身

押空其雇募頭舵工及水手。取具互保各結報明該管官存案。○雍正二年議准衛所等官僉差運軍差役擾害地方。又或以徵收錢糧為名藉端科派者。該上司題參照例議處。○三年題准各省幫船雇募水手及頭工舵工。責成衛備及領運千總。令前後十船互相稽查。並取本軍甘結十船連環保結。一船生事。十船連坐。糧道及押運等官。沿途稽查。並許地方官會同查訊。倘有隱匿不報者。總漕查出。一併題參。若不行題參。別經發覺。將總漕一併交部嚴加議處。○

四年定。江南省安慶前後兩幫。每船十七下。江
淮興武十八幫。每船十二下。其餘各省幫船。仍
照舊額。○六年奏准舊制。凡軍籍內身家殷實
堪充運者。概行向僉。並以十名為率。舍二軍八
著為定額。其各衙門書吏承差及生員餘丁。皆
在僉運之內。嗣後除文學生員專攻舉業者。准
其優免外。其援納之俊秀貢監及武生。均一例
僉運。如武生遇歲試之年。呈明學政。運回補考。
○又題准各省衛所。於糧船未經抵次之先。務
選殷實運軍。驗看註冊。俟糧船回空。如領運之

軍有犯事故者。即將註冊軍名。僉補。儻有僉選不實。或賣富差貧。將經僉看驗各官。照例題參。○乾隆五年定。有頂戴之丁。干犯濫規。照運丁例一體治罪。○七年定。運丁不正身。駕運者。將僉丁之衛備。罰俸一年。運官不行查出。降一級留任。隨幫知而不舉。照應申上而不申上。律議處。○八年題准。江淮興武二衛運軍。每有竄入黃快船內躲避。僉運之弊。嗣後黃快船丁。仍歸民賦項下辦理。將現運及備僉餘軍。逐一勾考。每戶下將子孫兄弟及兄弟之子若干。並住居

州縣都圖鄉鎮逐一開註。五年一次造冊送部稽查。如有隱匿查出。將該軍按律懲究。該管官照例叅處。○十四年定。各衛幫更換新丁。如在回空抵次未經開兌以前。該衛統於開兌時將額運船隻丁名註明原甲更僉之丁。於該丁名下摘敘更僉事由。聲明出廠年節彙冊送部備查。僉冊報之後。再有更僉。即隨時專案送部。○十六年題准。江蘇省蘇州松江常州三府白糧運下三年抽調一次。○二十三年奏准。凡隸軍籍富戶紳宦。如本幫有人駕運。原可暫緩僉運。

如丁力已疲。實應另僉者。卽富戶紳宦。徑行報
僉。敢有捏控狡辯。按律治罪。○又議准江淮興
武。二衛運餘各下。逃竄入快。嗣後遇幫缺下。一
快一運。挨次輪僉。每遇僉快之時。州縣舉報殷
實。正副二人。具結送道驗明。發幫領運。○二十
四年議准。湖北省未歸運之班操等軍。照湖南
省之例。一體停其句僉。○二十六年議准。凡軍
丁值僉選之年。無論衙門書吏官承。一體均僉。
如己身在公。卽令子弟承運。不得藉詞抗避。如
有以衛籍冒稱民籍。圖避僉運。州縣官蒙混出

結照例議處。○又題准湖南省荊州。荆左。荆右。沔陽。岳州。五衛。並無城舍等軍名目。其岳州一衛軍丁。運操一例。向僉所有各老戶名下新生丁。口及各屯業坐落坵段執業數目。責令荆案岳三府同知。四年編查一次。○二十七年題准。凡僉選新丁。止令千總結報。衛備知府驗看。加結詳道定僉。其同知通判點驗之例。永行停止。○又奏准湖南省各衛。如僉定之下。中途脫逃。將承僉之守備。降二級調用。雖有加級。不准抵銷。○二十八年定。旗丁捐納縣丞以下等官。俱

係在籍候選人員。仍令出運。不准更替。○又定。各省需丁。俱於回空後更換。豫選開丁註冊之處。概行停止。○三十五年定。旗丁須令家道殷實之人。令千總保結呈報。府廳驗看加結。如有挂欠。將保僉官降一級調用。一幫挂欠。府廳等官罰俸一年。糧道罰俸半年。幾幫挂欠。照此遞加。如將丁冊無名之人。混行僉補。將僉補之州縣官。罰俸九月。○三十八年議准。湖南省岳州。荆左。沔陽。二衛操軍。與運赤二軍一例。向僉而。荆州。荆右。二衛操軍。止幫運費。並不出運。嗣後。

應照岳州等衛之例一體僉運。○四十一年定。僉選運下。責成衛備。每十船中。擇有身家者。立為什長。自領兒至抵壩。皆令監管。十船無欠糧道獎賞。如有不肖軍下。許令出首免罪。通同作弊。一體究處。○又議准。湖北省江夏武昌嘉魚咸甯蒲圻崇陽通城興國大冶通山漢陽漢川沔陽黃岡麻城京山十六州縣。共清出徐州衛什軍七百七戶。即令徐州衛詳委千總一員。赴楚會同編審。如各軍所住村落未滿百戶。附入民戶編查。其民戶雜差。仍一體寬免。○又議准。

軍丁中有捐納中式各官生。於四年編審冊內。姓名下註明捐納中式字樣。不許冒填民籍。違者叅處。○四十二年議准。僉軍責令伍長公報。將昔富今貧。昔貧今富字樣。於四年編審冊內註明送部。儻有不實。將伍長究治。經僉州縣一併察議。又快運二丁。接頂疲丁船隻。如有舊丁積欠。勒令新丁接受。立即查明究治。又快丁新僉到幫。應領錢糧。統歸經管旗丁支領。糧道將銀米確數。按款刊單。給快丁照數支領。又江淮興武二衛運船。應令運快劈半分認。運丁之船。

以運戶更僉快丁之船以快籍僉補其快丁未
經僉足仍照向例輪僉俟僉足之日照此辦理
如應換之船高下不等責成糧道秉公覈明如
應大造者兩隻即一運一快分擊一隻則先運
後快其非輪大造者無論年分遠近運快各半
均分又快丁或係商販農工新僉到幫不善駕
運情願捐貼運丁亦情願受貼者准令快丁貼
費銀一百三十兩於漕糧未兌之先豫報糧道
給丁代運逢大造之年再貼造費銀三百兩快
丁之名仍留軍冊沿途風火事故著代運之丁

辦理又殷。丁最少之江淮頭幫與武三幫。循照什軍之例。一丁僉運九丁幫貼。責成伍長。據實查明公議。儻查辦不實。伍長從重究治。至快。丁規避出費者。即令倍加貼費。以濟貧丁。並令州縣於僉報快丁時。隨報什軍備案。糧道秉公查覈。○四十八年議准。各省州縣衛幫承僉運快。各下均以奉文僉派之日起。限兩月。僉解詳報。道府查驗後。發幫管運。並令該管道府查明該丁田地房產。造具細冊。送總漕衙門存案。設有虧短挂欠。查明賠補。若僉派之後。實係賣富差。

貧誤公滋事。或棄船脫逃。或將已革之丁重僉。或將軍丁改入民籍者。將承僉之員。實際降二級調用。不准抵銷。並將該管上司議處。○又議准江西省僉下。令州縣會同在次衛弁。秉公僉解。仍照例聽府道查驗。儻有遲延脫逃等事。該州縣與衛弁一體嚴加議處。○五十二年議准江。淮興武二衛快丁幫貼運費。及造費銀兩。責成該管州縣定限催徵解道轉解淮安。散給各丁。限內未完。將經散各州縣。按照分數指名查叅。

○五十三年

諭。嗣後江以南各省運下。竟當專交總漕。會同地方官
慎選僉派。江以北各省運下。即交該督撫慎選僉派。
以專責成。不得仍前將疲乏之丁。湊數充補。著該部
妥議具奏。欽此。遵。

旨議定。江以南之江蘇。安徽。浙江等省。專交總漕。江西。
湖北。湖南。並江以北之直隸。山東等省。交該督
撫管理。如州縣衛備。以疲報殷。僉貧賣富。道府
徇隱。故縱責成。專管之總漕。督撫查辦。其專歸
總漕管理之省分。仍准各督撫查參。交督撫管
理之省分。仍准總漕查參。○又定。湖南省運漕。

五衛除岳州衛屯坐本省岳州府境易於查察外。其荊州。荆左。右。沔陽等四衛屯坐湖北之荊州等府屬境內。軍丁散處。應統歸湖北查僉。仍將該四衛僉定新丁。移咨湖南查照。○五十四年議准各省編審軍丁。如四年之內家產稍有消乏。隨時另僉接運。令糧道同各道府督率衛所實力查察。○又議准各省編造軍丁。儻有故縱殷富及竄入民籍等弊。將營謀之本丁發往黑龍江給兵丁為奴。該丁之弟兄子孫仍編軍籍。僉派辨運。○嘉慶四年

諭嗣後有漕省分各督撫當嚴飭糧道及州縣衛所各員於僉丁出運一節務將殷實軍丁僉派充當或一丁力薄即酌令數家幫貼定為正副軍丁不許無賴貧丁充數○道光三年議准嗣後造送編冊無論軍丁曾否及歲均行入冊造報如有更僉亦即聲明因何更僉緣由並註明原甲係屬何丁隨時專案報部以便稽覈○光緒五年奏准江淮興武二衛快丁及海州隱軍軍興以後戶口蕭條暫免編審所有該二項籍貫仍應循照舊制毋任淆混

漕糧交兌○順治七年題准官丁兌米入船即
將所載米數懸於艙口○聽糧道不時查驗以杜
盜賣○九年題准漕船到次隨到隨兌隨兌隨
開不許久戀水次不得守候全幫藉端遲延○
十二年題准運軍兌糧交兌明白出有完糧通
關過淮虧少責在運軍不得牽累糧戶違者嚴
究治罪○又議准徵收漕糧定限十月開倉十
二月兌完如州縣衛所等官船到無米或有米
無船過十二月者罰俸半年過正月者罰俸一
年過二月者降二級留任○十七年議准各州

縣漕糧總漕頒發全單。糧道頒發號單。開明船米數目。刊定贈耗。分發各州縣。每兌完一單。著令衛官填註收數。一船兌足。即出給水程。勒令開幫。○又准漕兌首重米色。其有倉蠹作姦。攙和滋弊。責成監兌官。覈驗究處。如米色果係乾潔。弁軍故意勒索。按法重處。○十八年議准收兌漕糧。糧道先將各衛軍船分定前後。臨兌之時。州縣懸牌挨次輪兌。不得陵越。○康熙二十八年題准漕糧兌運事竣。定例將兌完過淮日期。並船糧細數奏報。巡撫不得過二月。漕司

不得過三月。河道不得過四月。嗣後各省漕船開行之後。巡撫即具疏題報。如遲至二三月始題者。叅處。○五十年議准。監兌漕糧。未經兌完。捏報兌完。漕船未經開行。捏報開行者。降二級調用。督撫不題叅。一併從重議處。○五十一年議准。監兌官務令坐守水次。將米逐船兌足。同糧道親押到淮盤驗。如有短少。審明題叅。仍留運軍子弟或兄弟之子一人。交與監兌官購補足數。雇船趕幫。取具押運等官甘結。呈報總漕查覈。○五十四年題准。各州縣交兌漕米。舊例

照取四升裝成二袋用印封固解送倉場驗收。嗣後水次兌糧每船裝米一石糧道親驗鈐印加封到淮之日總漕拆驗加封抵通之日倉場侍郎率坐糧廳驗明起卸其樣米仍作正收受。

○雍正元年

諭江西省產漕各州縣運糧到省又自省倉運上軍船故有脚耗扒夫修倉補墊等項編載全書歷來支給已久自康熙二十三年部中誤駁不准支給行令追還嗣後一例駁追究無完解至三十四年

聖祖仁皇帝特頒諭旨將從前已經支給者均免追賠。

恩至渥也。至康熙三十八年。部議又以腳耗與扒夫等項。分析未清。仍令扣追。不知腳耗乃貼運之總名。扒夫等項。乃支給之細數。其實一事。非兩項也。自康熙三十八年。至今已二十餘年。應追銀五十一萬餘兩。米六十一萬餘石。積累既多。究無完解。追比日久。官民均受其累。朕知之甚悉。著將從前積欠。盡免追賠。嗣後准其支給。以副朕加惠黎元體恤有司之意。

○又議准。漕糧開兌開幫之日。總漕務將各糧道所屬糧船數目。運軍姓名。細數文冊。豫行送部。違者叅處。○又議准。嗣後各幫務於冬兌冬

開如船到無米及有米無船以致開兌遲延誤
漕該督撫即指名題參○二年覆准湖南向例
七月開徵及運赴岳州水次每多遲至正月以
後嗣後務於十一月內運儲岳倉遲至十二月
中旬到者照過十二月兌開例議處過十二月
到者照過二月兌開例議處若州縣漕米運軍
漕船均到水次監兌領運官弁交兌稽遲致過
十二月者亦即照過二月兌開例議處如能依
限過淮該督撫據實題明開復○又覆准河南
省開歸等府辦買漕米十有五萬餘石由衛輝

至小灘經濟滑內黃大名四縣令分地分船米
多之地多撥受兌船米少之地少撥受兌船各
衛幫船到所撥之處交兌○又議准漕糧交兌
之時監兌官驗明實米足額面同州縣官交兌
漕船如有專覓巧手製斛飛筭走攬等弊即嚴
拏治罪如運軍額外勒索亦嚴拏治罪監兌領
運官弁不約束者總漕題參○又議准漕糧過
淮總漕按數查驗如正數有虧借水手所買包
米及借別船米湊數抵補者總漕即驗明印記
作為正米運過不得復歸水手別船仍將領押

運官題叅運軍治罪。○五年題准漕贈行月本色米麥及副耗等米照數裝載入船開行之日糧道查驗結報至糧船到淮總漕細加盤驗如有缺額分別究叅。○又議准到淮之船米色潮溼微變其虧折之米運弁出具米色結狀者著落該幫運軍賠補未出結狀者州縣及該幫運軍分半均賠。○又覆准蘇松常鎮太五府州屬漕船無論土著協運皆就向年原兌府屬止調本省各邑水次定以三年一調杜其久戀情熟盜賣鑽營之弊。○十年議准交兌漕糧責令監

兌官秉公查驗米色。如無潮溼攙和。兌完即照
例出具通關米結。不得勒索推諉。其有縣衛以
米色爭持者。將現兌米面同封固。馳送總漕巡
撫查驗。並申送委驗道員親往驗看。果係潮溼
攙雜。督令賠換篩廳。仍將所兌米樣封送總漕。
俟過淮時盤查比對。分別嚴叅。○又議准。交兌
糧米。例應乾圓潔淨。如有攙雜潮溼。在未受兌
以前。責在州縣。既受兌以後。責在弁軍。不得諉
卸。以專責成。○又題准。湖北省安陸府屬荊門。

今改直隸州 沔陽。天門。潛江。四州縣漕糧。向例運省。

水次交兌計程六七百里。輓運維艱。盤剝多費。其黃州府屬之黃岡等六州縣。每年有解交荆倉兵糧。計程千數百里。輓運尤難。應令彼此抵兌。以省上下運剝繁費。約抵兌米二萬一千一百餘石。共節省水脚銀千七百餘兩。解司充公。至於給軍截貼解荆耗米修倉等費。令各州縣自行給發。○十三年題准山東省臨清牘外之船。照定例冬兌冬開。牘內之船。定於次年二月兌開。仍依定限抵通。○乾隆十九年奏准。抵通米石。驗無微變。惟質嫩受潮。間或色暗。未能一

律純潔。暫令收儲。先行搭放。將糧道及押運員
弁。交部照例議處。○二十三年議准。漕船一報
開行。立即催督前進。如有報早開遲。將運丁責
處。糧道押運官。分別議處。○三十年議准。山東
省漕船。由牘內受兌之幫。俱於二月初開。開行
牘外各幫。每年十月赴德州臨清受兌。方報開
行。即已收凍。與春兌無異。即照牘內各船春兌
春開之例。畫一辦理。○四十二年議准。湖南省
附近荊州之巴陵等七州縣。漕米二萬六千九
百十餘石。就近運交荊倉。劃作南米。其湖北省

廣濟等十二州縣南米。卽派給湖南省幫船。俟順流通北。交兌抵還原款。○四十四年奏准。湖南省兌運湖北廣濟等州縣漕糧。於過北時。截留四十隻。分派各州縣受兌。俟南省幫船到齊。銜尾前進。如遇此年不應出運之船。於別幫截留。以符四十隻之數。○又定漕糧水次交兌。不足領運千總捏報兌足。開行希圖折乾分肥。其不行揭報之州縣。與聽許折收無異。與領弁一體科罪。管糧通判照溺職例革職。糧道照徇庇例降三級調用。不准抵銷。○五十四年議准。湖

北省崇陽通城二縣額徵漕米五千九百八十
四石零。改解荊州。抵補南米。以下游之蘄州等
六州縣解荊南米。就近兌交運船。劃抵漕額。

嘉慶二年

諭銅山睢甯二縣應運漕糧。向由黃河運至水次兌交
北上。現在豐汎漫口。下游未能疏消。間有淤淺。若由
陸路輓運。需費浩繁。殊多未便。所有銅山睢甯二縣
上年徵存米石。准其搭運。○四年

諭向來東省漕糧。原於十月運赴水次。至次年二月交
兌開行。並無貽誤。嗣經改為冬兌。冬開。雖為期較早。

但兌運未免緊迫米色不能一律純淨而收漕州縣受兌旗丁每因急促從事藉端滋弊且兌運雖在十月以內趨出牘口仍欲守凍至次年二月方能前進以重載停泊水次米豆等項既不免為水氣潮蒸又數十百漕船排列河干火燭亦為可慮而所在復須兵役巡邏旗丁雇覓舵水人等閒養在幫更不免徒增費用而於冬兌冬開仍屬有名無實嗣後東省漕糧著仍照舊例起徵運赴水次立春以後受兌完竣開幫挨次北上○五年

論山東漕糧向係冬兌上年奏改春兌原為免幫船守

凍起見。但本年冰泮之後。甫行受兌。以致開幫遲至
半月。實屬遲緩。若如此辦理。勢必有逾到通定限。而
南省回空船隻。在後行走。必致轉受凍阻。殊非妥協。
所有山東糧船。著改為冬兌春開。交巡撫督飭糧道
妥為經理。毋致遲誤。○又奏准山東省牘內各幫。隨
徵隨兌。一俟兌竣。即令開船。趕赴臨清。牘外停
泊。守乘明春冰泮開行。俾得依限抵通。其牘外
幫船。仍照冬兌春開之例辦理。○又奏准各省
幫船全單。由漕運總督覈明填註。飭發糧道。後
即由道遞行押運。領運廳弁蓋印。仍歸糧道繳

送總漕衙門備文徑交坐糧廳俟幫船抵通交糧後呈送倉場侍郎咨送戶部照例覈驗轉咨漕督衙門備查以除需索捏報之弊○又奏准有漕省分惟山東改作春兌其餘冬兌冬開例有定限乃向來幫船捏報開行往往遲至半月有餘應嚴飭有漕各屬及早開倉於例限內全行兌足儻船已抵次而米不兌交及旗丁津貼各款並不按糧給發則誤在州縣或船已報開而各丁猶稱購備食米器具逗遛水次則誤在丁弁俱責成糧道府州監兌各廳嚴密查察何

處遲誤分別揭叅。過淮時仍按幫查數。如有遲逾該管道府一併查叅。○又

諭向例豫省糧船跟東省各幫行走。今東省漕糧已改為春兌春開。而豫省仍係上年冬兌。自不必跟幫行走。致有稽延。所有豫省糧船抵通時。著倉場侍郎隨到隨收。毋庸拘泥舊例。○七年議准嗣後盤驗漕糧米色微變。經督撫奏明有案者。令州縣分賠六成。旗丁分賠四成。如兌漕時未經奏明者。仍照例著落弁丁賠補。○又定各省收兌漕糧。經徵監兌各官。務使米色一律純潔。不得稍有攙雜。

各幫受兌以後不時開倉風瞭毋致徵變虧短。儻有前項情事分別叅辦。取具經徵監兌各官印結。將米麥豆數分析載明。隨同開幫冊送部。並取具弁丁隨時風瞭結領一併送部查覈。○十二年議准安徽省池州甯太安慶等幫在次開行遲延。將千總押運等官降級革職戴罪督押抵通完糧後題准開復。○十五年

諭。東省距通較近。向來漕船春兌春開抵壩並不遲誤。自改為冬兌冬開之後。每年仍須在牯河守凍而米豆存倉日久。轉不無徵變之虞。又運河挑工。因軍船

在彼停泊。不能趨辦。多致遲誤。此外弊端尚多。自應仍復舊制。著自本年為始。將東省牘河內外幫船。照春兌春開之例辦理。但該管官務當督飭旗丁等。兌竣早開。沿途迅速趨行。毋誤抵通定限。○二十年覆准安徽省英山縣漕糧。向在六安州單家埠地方採買兌運。本年六安被災。無米可買。即在沿江出米地方。買交安慶幫船受兌。其應給旗丁贈五銀米及加一耗米等項。概照英山縣向給宿州二幫之數。兌給。所有一切通關文結。及樣米布袋。即用安慶府通判銜名印信。以專責成。

○二十四年奏准江蘇安徽浙江三省距淮較近。幫船皆係跟接兌開行走。嗣後過淮盤驗。如通幫米色俱好。止有一二船不能純淨。即責令旗丁將食米易換。仍治弁丁以應得之罪。與原兌州縣無涉。如查驗各船之米。均多灰暗潮溼。若非旗丁途次攙和。必係原徵之米。本係不純。弁丁扶同濫兌。應將州縣弁丁。分別叅辦著賠。惟過淮盤驗在後。通關米結在先。應仍責成弁丁認真受兌。不得恃有州縣分賠。濫行出結。如有需索貼費。含混出結。及疏於矚瞭等事。即將

監兌領運出結各官弁嚴行叅辦。○道光三年

諭江南蘇松常鎮太五府州屬漕糧定例皆就向年原
兌縣分三年一調以杜久戀情熟之弊乃遵行日久
姦丁蠹吏句串夤緣弊端叢出每以米色好而津貼
優者為上米色差而津貼少者為次一縣或分兌三
四幫一幫或分兌三四縣與整幫整縣之例全不相
符似此壟斷營私必致幫丁勒索日增州縣徵收無
節不可不另籌妥辦所有蘇松等屬漕船四十三幫
除白糧江淮鎮江等七幫無須更改外其蘇太松常
三十六幫該督等會同藩司秉公掣定整幫餘幫分

撥找補自本年掣定水次後每屆三年毋庸再掣即將上屆各幫挨次輪流受兌指明何年何幫應兌何縣漕糧造冊送部存案至上屆找補各縣之散幫下屆即併為整幫儘先受兌上屆在後之整幫下屆作為散幫分撥找補遞相輪轉以免偏枯○七年覆准山東省牘內州縣冬兌冬開或糧多收未足數或車少趕運不及准其水次就近買米墊兌仍飭趕緊徵完不得延至交代時將漕尾作抵尤不得藉墊兌為名概行折徵如查有勒令全折之弊即由該撫奏參懲辦○八年覆准江蘇省

各幫起運漕糧。向係通幫分灘均裝。自本年為始。所有各縣額兌之糧。即歸各次額運之船裝運。嚴禁幫弁混行派灘。並將均裝灘派名目永遠革除。遇有推造免雇船隻。除本次額船裝運外。所餘米石。於同幫鄰近水次。騰出數船帶裝。不得隔次派兌。及通幫零星灘帶派撥兌竣。仍於開幫冊內一併登造。○二十四年

論漕船各幫兌開遲早。乃運行第一關鍵。其沿途經過各河。船自當豫為挑濬。深通俾免淺滯。至江南蘇松二屬。素因米多。開行較緩。每致他省幫船被其阻壓。

現屆新漕徵兌之期。著江浙各巡撫一體通飭各縣。幫趕緊兌開。務遵渡黃定限。儻其中稍有不齊。即令兌竣之幫。漫越開行。毋庸停待。如江廣各幫。先至江口。亦准提令插當過淮。先行漕渡。至各幫渡黃後。是否仍須照依次序行走之處。並著該漕督隨時體察情形。督飭妥辦。毋任稍有阻滯。以利漕行。而重儲備。

○二十六年議准。江西省南昌衛前後等十一幫。掣括廳縣倉漕糧。遇有蠲緩。即在本幫減派。不得以極疲船隻減歇。並革除疲船名目。每屆兌運之先。糧道豫將幫船應兌應帶漕糧。並別

幫裝運撥歸本幫米石各就各幫覈計應兌應
縣廠口米數均勻配搭按照船數配籤若干該
幫如有獨緩即按應減船數配入空籤若干統
由糧道俾集弁下眼同籤掣該丁掣得空籤即
令減歇掣得何廳何縣何廠即令按照受兌無
論頭船腰船尾船統隨衆丁一體籤掣均不得
假門下書吏伍長等之手仍令漕運總督飭造
詳細清冊咨部查覈○咸豐元年

諭本年江蘇松江府屬漕船興武等幫延至四月上旬
尚未兌開離次總由該府縣及總辦幫弁等不能認

真籌辦。以致稽延。著勒限即日兌竣。離次晝夜趲行。星速飛輓。跟接前進。如再稽遲。著即從嚴叅辦。○三年奏准。河南省起運漕糧。因被兵被災完報稽遲。難照冬兌冬開舊制。改為春兌春開。○四年奏准。河南省漕船改為冬兌春開。○同治元年覆准。河南省彰德等府漕糧改為春兌春開。沿途程限。○順治初年定。催漕官弁無故容後幫船前行。前幫船後行者。罰俸一年。漕船入境日期。該管官不驗明轉報者。罰俸六月。○康熙二年題准。各省漕糧總漕刊發全單。開列本幫

兌糧軍船數目。行月修船錢糧。及到次開兌開
行過淮到通回空違限日期。與驗米色查夾販
款項。靡不備具。各弁投到全單。嗣後依式填註。
如有違誤不填。及填註不實者。在南聽漕運總
督在北聽倉場侍郎查覈指參。○十七年題准
各省漕船重運北上。自淮安至天津沿途原有
定限。再加酌定。如原限半日而違限一時。原限
一日而違限兩時。原限一日半而違限三時。原
限兩日以上而違限半日。原限四日以上而違
限一日。原限六日以上而違限一日半。原限十

二日而違限兩日者專催官罰俸一年。督催上司罰俸半年。如原限半日而違限三時。原限一日以上而違限半日。原限兩日以上而違限一日。原限四日以上而違限兩日。原限六日以上而違限三日。原限十二日而違限四日者專催官降一級調用。督催上司罰俸一年。如違限之期與原限之期相等。專催官降二級調用。督催上司降一級調用。如違限之期逾於原限者。專催官革職。督催上司降二級調用。○又題准各省漕船回空。自天津至淮安。向亦有定限。今回

空漕船如遇逆流設有牘壩蓄水之處均照重運定期無牘壩之處原限十二日者改為九日四日改為三日三日改為二日一日半改為一日又順流有牘壩之處亦照重運定例無牘壩之處原限半日改為三時一日改為半日四日改為二日五日改為二日半如催行不力以致違限沿途文武官弁並隨幫官皆照催趲重運例議處○又題准天津至通州重運係逆流每二十里限一日回空係順流每五十里限一日山陽至浙江重運漕船順流四十里限一日逆

流二十里限一甲。回空漕船順流五十里限一
日。逆流三十里限一日。如有違限。照例議處。至
鎮江過江。儻有因風守候。皆令地方官報明。免
其議處。再有江西湖廣並江南等處糧船行長
江至儀徵者。皆由大江因風輓運。難以逐程立
限。應令地方官作速嚴催出境。其自儀徵至天
津。如有違限者。亦照新定例議處。○又題。准押
運官自受兌。以至交倉。逾限一二處。罰俸半年。
三四處。罰俸一年。五六處。降一級調用。七八處
以上。降二級調用。十處以上。革職。○二十二年

輸漕運關繫甚大。一切定例。務期久遠可行。河道淺深。風勢逆順。各有不同。或遇積雨泥濘。緯路阻壞。易致稽遲。若一概從嚴處分。恐經管各官。徒被叅罰。運軍人等亦受苦累。究於輓運無濟。漕運總督管理糧船。是其專責。漕糧過淮及回空之時。應令總漕往來親催。不致貽誤。○五十一年題准。漕船受兌開幫。巡撫給以限單。填明開行日期。飭令沿河州縣。挨註入境出境時日。抵淮盤驗時。呈繳總漕查驗。過淮之後。總漕亦給以限單。將經過州縣原定限日。刊入單內。飭令沿河州縣。註明出境入境日。

期俟糧船抵通。申繳倉場侍郎查驗。○五十二年題准。各省重運及回空漕船。舊例遇有非常風阻冰凍淺滯之事。難以副限者。報明免議。嗣後漕船抵壩。守候齊幫。及山水漲發。牘溜難行。並撞沈搶修。均准於單內註明。免其叅處。○六十一年題准。重運及回空漕船。一入境汛地方。文武官及河官。率領兵役。親往催行出境。毋許停留生事。儻有運軍舵工水手生事為匪。專管各官。並不親往河干彈壓協拏。照溺職例處分。兼轄等官。照例議處。○雍正三年。

諭山東河南糧船過天津關日期自雍正四年起照依南漕三日一報。○七年題准漕船過淮之後經過阜河濟甯臨清三處定例係總河題報今山東河南增設總河嗣後重運糧船過濟過臨令河東總河題報其過阜河日期仍令江南總河後裁題報。○乾隆四年題准各運官豫將出運船數開單呈送總漕轉發經過各汛各汛弁兵候船入汛即照驗放行儻有勒索遲延者覈明究叅。○七年題准山東省糧船不到淮不由總漕給發程途限單受兌之後令運官即呈報總河及

巡漕御史

裁後

以便稽查催行。○八年題准。脫幫

遲誤降級督運之官。如題叅未經部議以前。有完糧報部者。准扣除免議。已經題結者。題請開復。○十年題准。漕船應增緯夫。著運弁運軍自募。不能概令多增。如短緯人夫勒索運軍。各汛千總。拏送巡漕衙門懲治。汛弁拏送不力。及故行捆打運軍。勒加緯夫。並緯夫暗串兵役。朋比為姦者。照縱役例議處。其漕船入汛。運軍不遵催行。無故停留者。該汛會同運弁責處。○二十年題准。江安。江蘇。浙江。逐船給限單一張。到淮

呈驗實屬繁冗。嗣後照江廣之例。每幫給限單一張。以歸簡易。○三十八年定。運官領運漕船。脫幫一二日者。雖因風阻修船。但不嚴督運。丁跟幫前進。照例降二級。戴罪督運。如有沿途脫幫三日以外。迨後又不趕幫前進。以致抵壩脫空五日之久。即將該運弁照溺職例革職。押運通判。照不行稽查致誤漕務例。降一級留任。○又定。漕船過境。沿河各州縣黏貼印花。如有先期查照上站出境時日。覈計本境限期。豫行填給。以致日時不符者。照違令公罪例。罰俸九月。

又沿河州縣於本境兩頭出入之所。選派親信家人一名。書役二名。給予印花。每幫頭船入境。尾幫出境。即在印花內確填時日。該州縣率同汛員稽查催趲。將填過印花。按次摺報該管各衙門查考。其從前運弁持單赴署黏印。並豫填時日之處。永行禁止。仍嚴禁書役人等。不得藉端滋擾。如有需索抑勒等弊。該督撫等立即查拏。從重治罪。該管官一併嚴叅究處。○四十年定。北河額設標夫三十名。自重運入汛起。至回空出汛止。令其多置標竿。指引糧船。○四十

八年定江都甘泉二縣運河水勢較淺急需挑濬現在煞壩興工漕船停泊俟啟壩開行係屬因公應於催趲限內扣除○五十四年議准江西省糧船開行巡撫及糧道遴委妥員帶領兵役於河溜兩旁分投插柳標記深淺船隻經由儻有走出標外以致淺間者立時究處○五十五年

諭本年山東河南江南浙江船隻行走迅速較之上年抵通日期俱早至數十日不等固由運河水勢充裕而沿途輓運亦屬奮勉上年豫東船隻遲誤曾將該

管官員等交部議處。則此次抵壩較早之省分亦不可不加之獎勵。所有山東河南江南浙江糧道及督運押運各員弁著該督撫查明咨部議敘。其丁舵人等並著酌量加賞。以示朕勸懲並用。悉歸公當之至意。○五十八年議准各省空重漕船經由直隸故城縣令專管之河道自孟家灣起至果子口止限一日催趲出境。如有遲延照例叅處。○嘉慶十五年

諭湖南三幫尾船在東境行走共計一百二十五日較上年在東行走日期雖少二十二日而比較上年七

月二十六日全出東境之期則又遲十八日若在直隸境內再有耽延。而到通後起卸不速。恐回空遲滯。沿途必致有凍阻等情。將來一切費手。著傳諭倉場侍郎。於幫船抵壩各船。並著上緊趲行。毋使在途遲滯。如有閘淺之處。應行撈挖。剝運者。均著隨宜妥為辦理。不可貽誤。

淮通例限○順治十二年

諭漕運至為重務。年來控欠稽遲。弊非一端。漕督固應盡心料理。各處督撫亦當分任責成。除湖廣漕糧暫留充餉外。江南江北江西浙江等處漕糧。著該督撫

督率所屬各糧道州縣衛所等官。恪遵漕規。冬兌春開。務依限到淮。其到淮以後。漕督查驗催趨。抵通交納。河南山東漕糧。該督撫率所屬各官。徵兌開行。知會漕督查催北上。係何地方遲誤者。自督撫以至州縣衛所等官。應擬何罪。屬何省分者。應限若干月日。戶部詳確議奏。欽此。遵

旨議定。各省漕糧過淮。應限月日。均照議單開載。江北各府州縣。限十二月以內過淮。江南江甯蘇松等處。限正月以內過淮。江西浙江。限二月以內過淮。山東河南。限正月儘數開行。如有司無糧。

軍衛船不齊備。以致過淮違誤者。違限一月以
上。督撫罰俸三月。糧道監兌推官。罰俸六月。違
限二月者。督撫罰俸六月。糧道監兌推官。罰俸
一年。遲至三月以上者。督撫住俸。戴罪督催。俟
糧船抵通。交明開復。糧道等官。降一級調用。其
領運等官。如兌糧及期開行。過淮違限十日者。
總漕衙門。捆打二十。違限一月者。捆打四十。革
職戴罪督押。俟交糧全完開復。如經徽州縣衛
所等官。船到無米。有米無船。過十二月者。各罰
俸半年。過正月者。各罰俸一年。過二月者。各降

二級留任。至漕督管理通漕。催趲尤其專責。及過淮以後。總河星速催趲。如過淮及期。而到通遲誤者。河漕二督及沿河鎮道將領州縣等官。亦照督撫糧道監兌等官遲誤過淮例。嚴加議處。○十七年覆准。押運同知通判。過淮抵通違誤者。照糧道例處分。○康熙十一年題准。山東河南。限三月初一日到通。江北。限四月初一日到通。江南。限五月初一日到通。江西。浙江。湖廣。限六月初一日到通。各省糧船到通。均限三月內完糧。如三月內不完。舊例不論月日多寡。各

罰俸半年。今議原限三月之外。押運等官。違限不及一月者。罰俸三月。一月以上者。罰俸六月。二月以上者。罰俸一年。三月以上者。降一級留任。○又題准。白糧過淮抵通。違限督運各官。皆照漕糧違限例議處。○三十四年題准。漕白二糧過淮。定例總漕將船糧數目。陸續具題。嗣後每年過淮漕糧總數。繕造黃冊。專疏具題。○四十一年題准。各幫過淮違限。實因兌竣開行。隆冬水涸之故。將過淮展限一月。若再有遲延。照舊例加倍處分。○四十三年題准。運官過淮違

限例應革職戴罪督押者。停其升轉。俟該弁領運漕糧全完。題請開復。准其推升。○五十一年諭。凡事不求根本。止務枝葉。斷無實效。條奏漕糧一事者。止以途間耽閤開兌遲誤陳奏。其漕船稽遲根原。從無一人言及。朕南巡數次。河道漕運知之甚悉。如上江漕船。皆入儀徵河口。下江漕船。皆入瓜洲河口。因大江泊船不便。而四千餘艘。彼此相爭入口灣泊。必俟到齊。始挨次開行。則守候之間。甚至遲誤。若凡一幫全到在先。不必等候各幫。隨令起行。過淮。其續到者。亦照此。毋令守候。止以船到即令起行。則前幫

得以早行。後幫船慮其隔絕，自然奮勉追行。如此則回空重運，斷不致遲誤。將此情由議奏，欽此。遵。

旨議定。各省漕船，照常令進儀徵瓜洲河口。至三汊河時，凡有一幫到齊，即催趲先行過淮。如有前幫船不全，總漕委官帶領後幫全到，船越過先行。其有停阻河道，爭相漫越者，嚴行約束。該糧道嚴催尾押過淮。如有不依限兌運，催趲過淮，以致遲誤，將糧道監兌押運，催趲各官題參，照例處分。又題准：過淮違限一二月者，仍照舊例處分。外。其違限二月以上，或七十日者，督撫降

一級裁罪督催糧道監兌等官各降二級調用。違限八九十日者督撫皆降一級留任。糧道監兌等官各降三級調用。又題准江南省漕船仍依原限正月以內過淮。五十七年題准江北江西浙江湖廣漕船過淮仍照舊例扣限。至過淮既不展限一月嗣後如有違限仍照舊例處分。停其加倍議處。雍正元年奏准部發效力武舉委運事竣坐糧廳勒限一月到淮考覈。如有過淮違限革職捆打之案。總漕照例發落。題請開復。三年題准漕白糧船抵通日期及

到通起過糧數。騰卸回空船數目。並石壩外河水勢深淺。五日一次奏聞。○六年題准。過淮抵通。向例各按定限。扣算題參。嗣後江南。江西。浙江。湖廣。糧船過淮。違限已經議處者。於抵通完糧之日。將原參過淮違限日期。准其扣除免議。道遠省分。以九月初十日為限。逾此限不完糧者。官弁從重治罪。○十一年題准。廬州。衛頭。幫向隸江北。原限十二月內過淮。今照江甯等幫。於正月以內過淮。○十三年題准。運官過淮。違限。部議革職之案。未經開復。不准議敘加銜。○

乾隆元年題准淮揚運河河底加高。自應疏濬。將乾隆二年回空漕船及早一月過完。乾隆三年重運展限於三月進瓜洲江口。○二年奏准開濬運河。增建牐壩。欲回空之迅速。必令重運之先期。將乾隆二年重運過淮之例。暫為變通。如領運千總違限三日。監押督催等官違限十日。一概題參。果能空重依限過淮。加等議敘。若運軍空重亦能依限抵通全完者。准作五運前後全算滿日。給以頂戴榮身。○又題准蘇浙漕艘。照從前原限過淮。不照新例議敘議處。其丹

陽以北先期過淮者仍加等議敘○三年奏准疏濬運河以正月二十四日開壩之日起限江北江南幫船均限一月內全數過淮江西浙江湖廣幫船再限一月內全數過淮如有違限照例覈參○四年奏准江南省大挑河道丹陽儀徵二處築壩糧船阻滯蘇松常鎮太五府州屬各幫展限一月江廣各幫展限半月過淮○九年題准糧船過淮限期向按各省程途酌定未分各府遠近及道路難易江南下江之松江府與浙江道路相等但松江必由蕪湖澱山等湖

湖南經涉洞庭江西必由鄱陽不能逆行前進
各幫到淮均在浙江湖北等省之後應將江南
松江府及江西湖南幫船於過淮原限外寬限
十日○十年題准各省過淮違限之運弁例應
捆打除違限不及十日者仍照例免議違限十
日應捆打二十亦仍照例准其完糧扣除免議
如違限一月及一月以上者該督按違限日期
即照例捆打發落於題參案內聲明○十八年
題准浙江省回空漕船因高寶一帶水溜抵次
較遲不能歲內兌開展限一月過淮○二十五

年定直隸省安陵汛起。至天津關止。計程五百七十八里。重運北上。每日限行五十八里。如遇守風淺阻。隨時報明。無故違誤者。叅處。○四十二年覆准。漕船經過山東省臨清州境內河道。例限三日。本年奉辦臨甌三十萬塊。分作二年搭解。若照原定三日之例。不免遲延。應展限一日。糧船到境裝甌。不致逾限。○五十九年

諭各省糧船到通。每年排列原無一定。若必按本年某幫到通日期。與上年之某幫到通。比較遲早。設如上年出運之淮安二幫。本年並未出運。又將憑何比較。

如此辦法。豈不太拘泥乎。著傳諭倉場侍郎。此後具奏。竟按到通幫船之次序。比較遲早。按次而稽。自可一目了然。不必拘泥向例。或致前後牽混。○又

諭本年漕船。因春夏之交。衛河水淺。行走不能迅速。節經派員分段。寬淺設法。趨運以利。進行原擬於全漕抵通時。將總漕及催押委派各員。交部議敘。但現在漕船抵通。比較上年遲至一月有餘。皆由該漕督等不能沿途催趨。行走耽延所致。本應予以議處。姑念此次全漕抵通。尚在白露以前。比從前遲到。在白露以後者。為期較早。著從寬免其議處。如明年漕運再

有遲延。必治以應得之罪。○六十年

諭本年因二月節氣較遲。所有漕船渡江渡黃。以及抵通日期。准其展限半月計算比較外。遇無閏年分。仍照舊與無閏之年比較。不得再以有閏之年牽混計算。以致影射遲延。○嘉慶七年議准。嗣後漕船抵通回空。比較遲早。專交倉場侍郎查照向例五日具奏一次。毋庸戶部繕單。仍令報部查覈。遇有逾限遲誤。及奏報舛錯。戶部指參。○道光二十八年

諭現在海運兌米。未能計日完竣。河運南糧首幫已抵

津關以後各幫陸續輓入直境均已將次到津若待海運尾撥方准過關恐後進幫船挨次頂阻且本年首幫入直之期比上年已遲六日再有耽延致誤歸次限期更於全漕大局有礙所有現抵津關各幫著該督按照舊章隨到隨放所有海運剝船插當行走兩無滯礙即令稍滋弊混尚可將海運米石暫卸北倉先令漕船北上無誤回空方臻妥協豈有將重運軍船暫免催提之理著倉場侍郎於海運河運兼營並收不得顧此失彼儻軍船因阻止行走以致回空未能依限歸次有誤大局惟該侍郎是問懍之○又

諭漕糧為天庾正供。節經降旨。今有漕各省督撫嚴飭所屬早兌。早開。剋期渡黃。毋稍延誤。乃近年重運漕船不能如期抵壩。以致到通歸次。兌受新漕。節節耽延。總緣各該督撫不肯破除情面。實力催趲。所致。况本年邳宿一帶水漲溜激。十字河噴沙淤墊。江廣各幫即在安陵剝運。抵通更形遲滯。現已節逾霜降。水勢日消。若不趕緊催趲。及早歸次。儻誤新漕。受兌關繫匪輕。著漕運總督及沿途各督撫分飭嚴催。務使連檣南下。銜尾遄行。不准片刻停留。庶幾以速補遲。如期歸次。來年新漕尤當趕緊辦理。按期兌開。統限

於四月初十日以前全數趨至清江剋期抵壩以便渡黃北上。毋許稍有延誤。儻豫存遇運之年。時日較寬。一味怠玩。視為具文。仍致臨時周章。有逾例限。定將該漕督及各該督撫嚴行懲處。

回空例限。○順治初年定。河漕總督專管漕運。如回空船不力催。又不題叅地方官者。降二級留任。又回空漕船。如後船已過。前船未到者。押空官照例叅處。○十二年題准。沿河督撫鎮道等官。遇回空糧船入境。立刻催行。將入境出境日期報部查覈。○十六年題准。漕船回空到淮。

總漕將各船照重船過淮例。令押空官先期投
驗限單。查明各幫原過淮船數。如有缺少。按律
治罪。其山東河南二省不過淮者。專責糧道稽
查。○康熙四年議准。漕船到通。限十日內回空。
倉場定立限單。責成押幫官。依限到淮。沿河各
官。立催過汛。如汛地官不力。催指名題參。○五
十一年題准。回空漕船。倉場侍郎給發限單。將
經過州縣界址。照原定限日。列入單內。令沿河
州縣註明出境入境時日。至淮申繳。總漕查驗。
別給抵次限單。亦令沿河州縣註明入境出境

時日各船抵次之限。不得出十一月終。將限單申繳巡撫稽查。○五十八年奉

旨。回空漕船於限內到次者。不必具奏。限內不到者。著聲明題參。○六十一年題准。押運通判所押尾幫船糧。起卸完申。坐糧廳即將批回印發送部查驗。令其押空南下。如通判及隨幫託故不親管押回空。以致水手生事者。照規避例議處。如坐糧廳留難不發批回者。亦照例議處。○又題准。運弁交糧完日。坐糧廳立給完呈限單。勒限一月到淮投驗。如有逾限。照規避例議處。○乾隆二

年題准山東省自備船於交糧之日除留船頭
一二人。在通候領董羨完呈等項外其餘各軍
令倉場侍郎給予空身限單勒令回次將限單
繳送各衛所查驗如有違逾分別責懲仍將限
單填明到次日期彙送糧道考察儻有違誤不
到別詳僉補仍將運軍嚴究如沿途生事發覺
後該衙門詳報究治留通運軍事竣回次如有
違誤一例究治○又題准淮揚挑濟運河回空
漕船抵次趕早一月○三年奏准糧船起米後
領運千總督同正丁料理回空身工飯米開船

有不齊備者。隨幫回明倉場查究。坐糧廳監督衙門。應給糧席完呈。俱限十日內給發限單。星飛趕幫南下。總押丞倅引。

見後部內亦與限單趕歸大幫。督同前進到淮。漕運總督查覈。如有違誤逾限。即行叅處。○二十年議准。嗣後令領運千總。協同押空之員。跟幫南下。報明倉場。並沿途督撫。轉飭地方官。換幫稽查。毋許逗遛。儻有藉故稽延。及私自回籍。押空千總。同地方官。據實申報。該管上司。嚴揭叅處。○又題准。過淮日期冊。由總漕咨部。抵次日期。

冊令糧道造報巡撫咨達○二十二年定丁船
回空不跟幫前進脫空者運弁罰俸半年○二
十四年定回空糧船偶遇淺阻隨幫並不設法
推活以致到次遲誤者革職○四十一年定回
空漕船限內不能到次者照例叅處其應運新
漕總漕查明或派撥減船或攤運雇募依限兌
運其遲到之船來年開凍時沿河文武官員飛
催過淮受兌北上如不設法依限兌運將在南
之糧道監兌州縣等官題叅治罪如原船不能
過淮受兌有誤北上即將在北沿河催趲回空

文武各官題參治罪。○五十四年議准江西省
回空糧船每至正月到次三月開兌四月兌完
應令各督撫轉飭沿河文武員弁務照重運一
體嚴催以符冬兌冬開之例。○道光四年

諭孫玉庭等奏回空漕船全數渡黃一摺。本年回空軍
船停待日久節經降旨嚴催。茲據該督等將束清禦
黃兩壩大加拆展清水暢順於本月初四日軍船全
數渡黃辦理尚屬妥協。現在節逾冬至漕船歸次已
不為早該督等務須節節催趲俾銜尾前進趁此天
氣融和並無冰凍晝夜兼行以速補遲及早歸次無

誤冬兌冬開日期。至來年新運北來。尤為緊要。河口
一帶。如有淤淺處所。必須及早籌疏。著孫玉庭。張文
浩。督率河員。趕緊妥辦。務令一律通暢。毋致臨時再
有阻滯。致干重咎。

欽定大清會典事例卷二百六

戶部

漕運 計屯貼運

計屯貼運

謹案漕糧自成豐初年改辦海運各省衛官有名無實旗丁亦無承充之

人。所有計屯貼運名目已不復存。所徵銀兩或提充海運經費或歸入漕項款內解部均詳見

本門事例。茲將嘉慶會典所載貼運原數詳紀於左以備稽考。○直隸通州天

津二所屯地每丁派給五十畝

節年裁減屯丁原領屯地改歸

現運各丁名下屯地與原領多寡不符。每畝原額新徵租銀自二

分至一錢不等。交與地方官按年徵收。闕解該

幫所散給各丁。按該丁原領屯田租數按名散

給。山東屯田除東昌衛之東昌幫。濮州幫。東平所之東平幫。係現丁執業收租外。其濟甯臨清平山三衛幫屯田。什軍一體領地。一軍駕運。九軍津貼。內濟甯衛之前後兩幫。臨清衛之山東前幫。河南前後兩幫。俱每畝徵租銀五分。以四分五釐給本幫各船贍軍之用。以五釐酌給濟甯衛左右二幫。臨清山東後幫。濟運東昌衛平山前後兩幫。承種無糧軍地。每畝津貼銀六分。有糧地畝。及軍民費有工本墾熟地畝。每畝津貼銀四分。德州正左二幫。及任城幫運船。俱每

船各給贍軍銀十兩。

德州正左二幫。於屯糧項下動支。任城幫於地丁項

支。下動江南江安糧道所屬江淮興武二衛。於州

縣歸併省衛快丁屯田額徵錢糧內。每銀一兩。

米一石。各徵津銀一錢。徐州衛屯運田除運丁

自行執業外。民人典買及閒丁領種並衛田。每

畝徵津銀七分。正衛閒丁執種田。每畝徵津銀

二分。其籍隸湖北之什軍。每戶津貼銀自七八

錢至四五六兩不等。共津銀一千六百八兩有

奇。永定額數。官為徵收。解交淮安府庫。給丁濟

運。安慶淮安二衛。並揚州衛之頭幫三幫。儀徵

一幫屯田。現丁自行管業收租辦賦。揚州衛二幫減丁津貼現運銀。每船十五兩。又按租銀一兩。加銀二錢。新安宣州。二衛屯田。不論軍民管佃執業。每畝徵津貼銀八分。建陽衛民典屯田。每畝徵津銀一錢二分。廬州衛屯田。每畝徵津銀六分。鳳陽衛糧田。徵津銀一分。運田。無論閒丁民戶執業。正衛常州頭幫。每畝徵津銀三分五釐。前衛二幫運田。每畝徵津銀三分七釐。後衛三幫運田。每畝徵津銀二分。懷遠二幫運田。每畝徵津銀六分七釐。中衛頭幫。不分軍執民

佃。每畝徵津銀三分九釐。左衛三幫。右衛二幫。並洪塘所。每畝網軍津貼銀自一分至八分三釐不等。其正衛頭幫。前衛二幫。後衛三幫。每畝加徵津銀二分五釐。各歸各幫支領。長淮衛糧田。每畝徵津銀一分。三幫運田。每畝徵津銀一分八釐。四幫運田。每畝徵津銀一分六釐。宿州頭幫運田。每畝徵津銀九釐六毫有奇。糧田。每畝徵津銀一分。二幫屯田。原六安衛歸併者。每畝徵津銀三分。旗丁自行收取濟運。原武平衛歸併者。江南之亳州。河南之睢州。鹿邑。柘城。太

康四州縣屯田。每畝徵津銀一釐七毫有奇。泗州衛屯田。無論軍民執業。坐落泗州者。每畝徵津銀一分。坐落盱眙。天長。來安。高郵。寶應。各州縣者。每畝徵津銀一分一釐六毫。典出運田。按錢糧一分。徵津銀二分五釐。大河衛屯田。屯丁自行執業外。減丁執業田。每頃收津銀五錢八分一釐。蘇松糧道所屬蘇州。太倉等衛屯田。現丁自行管業。收租辦賦。其太倉衛屯丁自行執業田。每畝津銀一錢。運丁自行收取贍運。鎮江衛屯田。無論荒熟。每畝交租六斗。鎮江衛前後

二幫民人執業屯田。每戶津貼米五斗。又挂戶
運田。每戶徵津銀二兩。又攤歸屯田。每畝津銀
一錢。金山幫屯田。坐落上海等縣二十四堡民
典地畝。每畝津銀五錢五分八釐。又民人執業
屯田。每畝市平市色津貼銀四錢。又坐落南匯
縣軍民典賣並屯丁原墾地畝。每畝津銀二錢。
給軍濟運。浙江各衛所運船。每船給田一百二
畝。八分六釐有奇。內除杭嘉湖三衛所。俱係運
丁自行執業完餉收租外。惟杭嚴衛坐落餘杭
縣溪西白社等七莊屯田四千一十五畝零。按

照上則田。每畝折收錢五百二十文。中則田。每
 畝折收錢四百七十文。下則田。每畝折收錢三
 百五十文。仍於每畝聽給佃戶修築塘費錢七
 十文。不論年歲。照額清納。責成餘杭縣官為徵
 解。給丁濟運。其甯波。紹興。衢州。嚴州。台州。温州
 等處屯田。有因寫遠歸佃完餉輸津者。內衢州
 所屯田。以一百畝六分九釐七絲為一單。共派田一百一十六單七分。每單徵
 津銀九兩九錢五分。又本所改則田一千七百餘畝。加租穀四百石。折銀
二百六十兩。嚴州所屯田。每畝徵津銀一錢五分九
 釐八毫。屯地每畝徵津銀六分九釐八毫。台州

衛上田。每畝徵津銀一錢。中田每畝徵津銀八分五釐。下田每畝徵津銀七分。温州衛屯田。並温州衛派給甯波。紹興。處州。三衛屯田。上田每畝徵津銀七錢。中田每畝徵津銀五錢。下田每畝徵津銀四錢。每年均令衛所印官徵解道庫。給幫濟運。江西屯田。除南昌撫州二衛所地基山塘堰。並袁州。贛州屯塘。不徵餘租。又吉安所撥給龍軍五船屯田。自管收租贍運外。其餘各衛所屯田屯地。除完正糧外。均分別議收餘租。官為徵收。按各衛幫餘租多寡。分給各丁。餘贍

銀兩。存公備用。內南昌衛一則上田。每畝徵租銀自四分五釐至二錢二分。二則中田。自三分五釐至二錢。三則下田。自二分五釐至一錢六分。一則上地。每畝租銀五分。二則中地。每畝租銀四分。三則下地。每畝租銀三分。運丁每船每運給銀五十五兩。袁州衛軍管屯田。每畝徵租銀一錢。民管屯田。每畝徵租銀一錢七分。軍民管種屯地。坐落宜春分宜二縣。每畝徵租銀八分。萬載縣。每畝徵租銀六分。萍鄉縣。每畝徵租銀四分。運丁每船每運給銀七十兩。贛州衛一

則上田。每畝租銀自七分六釐至二錢八分。二則中田。自六分二釐至二錢四分。三則下田。自四分八釐至二錢。又新墾山頭地角及民人墾荒熟地。每畝徵銀八分。其公田及民人首報墾熟地。暨新墾額外新生等田。按上中下則。每畝科租不等。共徵米一萬八千七百二十七石零。每石折徵銀五錢。運丁每船每運。給銀二百八十兩。信豐所軍管屯田。每畝徵租銀五錢。又閩省寄莊改歸贍運田。每畝徵租銀八分。運丁每船每運。原給銀三百五十兩。加給銀六十兩。嘉慶

五年奏准。在於該所。會昌所屯田。每畝徵租銀
歷年餘租銀內加給。

三錢。又本戶及首墾田。每畝徵租銀二錢。武平
縣寄莊田。每畝徵租銀八分。運丁每船每運給
銀三百一十兩。南安所屯田。每畝徵租銀二錢。
給撫州所城軍濟運。九江衛。一則上田。每畝徵
租銀二錢二分。二則中田。每畝徵租銀二錢。三
則下田。每畝徵租銀一錢六分。一則上地五分。
二則中地四分。三則下地三分。運丁每船每運
給銀八十七兩。吉安所。坐落廬陵縣屯田。每畝
徵租銀三錢三分六釐。坐落龍泉所屯田。每畝

徵租銀一錢。又龍泉縣歸公屯田及清出開墾地。共計九十二頃六十四畝有奇。統徵租穀八千九百六十三石有奇。每石折徵銀四錢八分。運丁每船每運給銀五十兩。永新所屯田。係以租科畝計田一百二十頃一十七畝有奇。共徵穀一萬七千四百石有奇。每畝折徵銀三錢二分。運丁每船每運給銀一百兩。安福所屯田。係以租科畝計田一百三頃一十一畝六分有奇。實徵租穀一萬五百二十五石有奇。每石折徵銀四錢。運丁每船每運給銀一百兩。撫州所一

則上田。每畝徵租銀自四分五釐至一錢六分。
二則中田。自三分五釐至一錢四分。三則下田。
自二分五釐至一錢二分四釐七毫有奇。該所
軍分城屯。城軍每船每運給銀八十八兩八錢
六分二釐。屯軍每船每運給銀一百二十兩。建
昌所屯田。每畝徵租銀一錢七分。又新墾屯地。
每畝徵租銀一錢。屯田統收租穀。按地肥瘠。每
穀一石。折銀自二錢四分至四錢。運丁每船每
運給銀一百兩。廣信所。一則中田。每畝徵租銀
二錢五分。二則下田。每畝徵租銀自八分至二

錢。一則下田。每畝徵租銀四分。運丁每船每運
給銀一百一十九兩。弋陽貴溪。二縣所轄船二
隻。每船每運。給銀二百兩。鉛山所。一則上田。每
畝徵租銀三錢。二則中田。二錢四分。三則下田。
鉛山縣。每畝徵租銀一錢六分。弋陽貴溪。興安
三縣。每畝徵租銀二錢。下則屯地。每畝徵租銀
四分。運丁每船每運。給銀二百六十兩。饒州所
一則上田。每畝徵租銀自四分五釐至一錢二
分。二則中田。自三分五釐至一錢。三則下田。自
二分五釐至九分。運丁每船每運。給銀六十兩。

湖北各衛所屯田。除完正餉外。按糧多寡。官為徵收。幫費分給各船濟運。武昌武左。二衛均按糧一石。運屯額徵幫銀五錢。絕屯徵銀三錢。黃州衛。按糧一石。額徵幫銀三錢八分。蘄州衛。按糧一石。額徵幫銀五錢四分。德安所。按糧一石。額徵幫銀七錢三分二釐。襄陽衛。計畝徵銀。每畝上則徵幫銀三分三釐。中則徵幫銀一分六釐。下則徵幫銀一分一釐。在乾隆四十年清屯案內。其典賣與民戶屯糧一千三百九十餘石。於原額正餉幫銀之外。加徵津費。凡坐落武昌武左。蘄州。德

安四衛所者。按每石加徵津銀一兩三錢。黃州衛每石加徵津銀一兩二錢。襄陽衛按上則每畝加徵津銀七分。中則四分。下則三分。每年隨同原額幫銀解交道庫。勻給丁船濟運。湖南岳州衛屯田。運軍操軍。按糧徵費。每運每船統給運費銀一百五十兩有奇。荊州衛運田。按正餉銀一兩。徵運費銀一兩四錢三分有奇。操田。按正餉銀一兩。徵運費銀一兩二錢一分九釐有奇。赤丁八十名。按名派徵運費銀一兩七錢五分。枝江。彝陵。長甯。遠安等四所軍丁。隸荊州衛。

轄向不出運止幫衛丁銀六百六十兩。因勞逸不均。照岳州旱衛按田加津之例。再加津銀二千六百四十兩。每年共徵津貼銀三千三百兩。

按田畝上中下牽算。每畝徵銀二分六釐零。由屯坐州縣徵解湖南

糧道。為荊州衛幫船濟運之需。每運每船統給運費銀一百九十九兩九錢八分。下賸銀兩。為造船及調劑幫務之用。荊州左衛屯田。按正糧一石徵運費銀六錢四分六釐三毫有奇。每運每船統給運費銀一百八十兩。荊州右衛運田。按正餉銀一兩。徵運費銀一兩四錢二分九毫。

有奇。操田按正餉銀一兩。徵運費銀一兩二錢七分五釐有奇。赤軍四百八十名。按名派徵運費銀一兩三錢三分有奇。每運每船統給運費銀一百六十兩。河陽衛運班二田。按正餉銀一兩。徵運費銀九錢二分至一兩七錢三分不等。赤丁每名徵運費銀二兩四錢。每運每船統給運費銀一百二十兩。

各省屯田額數詳見田賦

○順治五年

定。德州衛撥給德州左衛屯地五百七十一頃三十二畝零。給丁貼運。其地仍令德州衛承種。每畝輸賦外。津貼左衛運丁銀二分七釐。○十

三年題准。德州正衛屯地。每丁勻種四頃七畝。零輪流出運。其不出運者。每歲輸正賦外。每畝公出銀二分一毫。津貼運丁。民種軍田者亦如之。○康熙十年題准。湖廣屯田。分衛分船。將各衛屯田。並附近之荊州等四衛丁船。及武左衛找補之四丁船。聽湖南糧道催運督徵。湖北武昌等六衛丁船屯田。聽湖北糧道催運督徵。○乾隆二年奏准。各省屯田。如有佃種不清者。令總漕各該省督撫酌量清理。○又題准。湖南省長沙等三十七州縣。統計閒丁一千八百九十

五名。每丁徵銀二錢。共徵丁銀三百七十九兩。因各丁內有無產窮丁無力完納。議令照依人丁匠班之例。攤入各州縣地糧徵收。○三年

諭。朕思惠養斯民之道。以輕徭薄賦為先。凡各省田糧稍有偏重之處。悉已陸續豁免。以紓民力。今安徽所屬懷遠衛軍田十三頃。每畝徵銀八分八釐有奇。較之民田未免稍重。著照蒙城縣民田之例。每畝徵銀二分一釐有奇。共免銀九十八兩八錢七分。又武平衛軍田五千二百九十一頃。每畝加徵銀七釐三毫有奇。除現在請禁衛田之私典等事案內。每畝應留

贍運銀一釐七毫外每畝著減去加徵銀五釐五毫有奇。共免銀二千九百六十二兩六錢五分。該部即遵諭行文該督撫。自乾隆三年為始。永著為例。○五年奏准屯田租與民人耕種。該運軍止許得當年租銀。如加別年租銀立券私交者。照私典軍田例與受皆行治罪。其田追入新運之軍。租價入官。○又題准浙江省温州衛屯田三萬一千二百三十四畝。內撥派本衛二幫田萬六千二百九十三畝。該衛各軍均交親屬管收外。其餘田萬四千九百四十畝。找派甯紹處三衛之軍。

從前原因相隔遙遠。未經執業。未幾又遭兵燹。屯民墾熟為業。以致軍民爭訟。今議定按照上田一畝收穀三石。中田二石。下田一石六斗。各半平分之數。輸津給軍。其佃戶輸津完餉之處。令該衛徵比。該管府道催徵。分別解餉給軍。衛備徵解不全。照例叅處。佃戶不能完納。別召良佃耕種。私自典賣者。治罪。○又題准。各省屯田。徹底清查。將實在數目。造具清冊送部。儻不實力奉行。該督撫一併題叅。○八年題准。湖北省武昌等衛所屯田。清出原額。有屯清屯。無屯清

費。每年德安所額船三十三號。每船得幫銀百六十二兩。襄陽衛三十船。每船給銀百七十兩。武昌衛五十六船。武左衛五十五船。每船得銀一百四十七兩三錢。黃州衛二十六船。每船給銀一百二十五兩。蘄州衛三十二船。每船給銀一百三十五兩各有奇。○又題准湖北省荆左衛成熟並新墾升科屯田二千二百五十五頃八十五畝有奇。荆右衛成熟運操屯田二千二百二十五頃三十二畝有奇。沔陽衛屯田千九百六十六頃三十畝有奇。又軍操田八十四頃有奇。

荊州左右中前後五所屯田六百十有二頃十有四畝。操田千三百十有五頃五十八畝。各有奇。應令運軍民佃。照糧一例分派。凡軍田典賣在民。及頂絕墾荒年久。造有房屋墳墓。願當軍差者。即將本人編入軍戶當差。軍置軍產。田差均去者。亦准其當差管業。其田不准回贖。如民買軍田。不願當差。及軍買軍產。田去差存。而原戶貧乏。不能回贖者。分別津貼。以贍漕運。○九年題准。江西省屯田。清出原額新增田地。基山塘堰。除豁除坍塌外。現在成熟者五千三百三

十七頃七十八畝有奇。內南昌前左。撫州。鉛山。饒州等衛所隨田地。基石塘堰。並建德縣補軍屯田。鉛山所運軍隱匿入官屯田。袁州屯田塘五百七十六頃六十畝。不徵餘租。九江。廣信。鉛山等衛所成熟屯田二千四百二十七頃七十五畝有奇。應徵餘租。軍丁利於自取贍運外。其南昌等衛所軍民管業屯田二千三百三十三頃四十二畝有奇。每畝派徵餘租不等。每年徵租銀九千五百九兩有奇。吉安所坐落龍泉縣丈出餘屯改升民田六十一畝。每年徵租穀折

價銀四十兩九分有奇。均由縣徵收解道轉給各衛所運軍。勻分濟運。○十年題准。山東省衛所屯田。除東昌濮州東平三衛所並無什軍分種。均係現運之軍執業外。其濟甯臨清平山三衛所地畝。什軍一例領地。一軍駕運。九軍津貼。臨清衛貼運。山東前幫。河南前後兩幫。每年每畝津銀三分。濟甯衛貼運。濟甯前後兩幫。按地定肥瘠。照收成分數折給。東昌衛之平山前後兩幫。每年每畝津銀八分。其典賣地畝。逐漸贖回。歸輸運之軍。亦令同贖。田租輸收。嗣後若再

典賣與受一併治罪。追田給運。典賣地內葬有墳墓者。酌給畝數。永行津貼。什軍應贖地畝。未贖之前。一例津運。各幫永減船及閒運軍田內有糧地畝。每年每畝津銀八分。以二分完糧。六分津運。每歲津銀。令各衛彙齊。按原減原畝幫次。勻給現運各軍。久荒屯田。軍民費本開墾者。給照執業議津。每年每畝津銀六分。以二分完糧。四分津運。○又題准。浙江省屯田。除康熙二十五年裁減駕軍田畝外。按各衛所出運千四百四十一船。每船給田百有二畝。八分六釐有

奇運軍有自能執業者。即令運軍完納收租。有因坐落遙遠。以及零星硤瘠。不能自執業者。歸屯佃管辦。完餉輸津贍運。其津銀數目。照依地土隨時酌定。令衛所印官徵解給軍。○又題准德州正左二衛贍運屯田。坐落直隸山東二省。從前原係軍民承種貼租。各軍自討勦運。或有或無。有名無實。今清出地二千四百二十九頃有奇。每年每畝以一分起租。共銀二千四百二十九兩有奇。分給運軍五十六名。每名每年給銀十兩。什軍五百四名。每名每年給銀三兩七

錢有奇。如隸本衛者。由衛徵租。如隸直隸者。每年造冊咨送直督。轉飭州縣徵解衛備。一例分給各丁。任城幫四十七船。並無額產。仍照向例。每船每年給贍軍銀十兩。於地丁內動給。彙入漕項奏銷。○十二年題准。各省贍運屯田典賣與民。照例備價回贖。由衛所移明州縣。飭令民人收價退田。儻地方官不即飭退。照承辦遲延例。叅處。如該軍不備價。妄控退田。或實係民田。故作軍田。捏報詐冒者。將該衛所官弁分別議處。儻各衙門書識人等。有隱占屯田情弊。該管

官弁。皆照夫察衙役犯贓例議處。該役照侵盜官糧例治罪。○十三年題准。湖南省荆左荆右沔陽三衛。有貧乏赤丁。按照原派輸幫銀數。減免幫貼。枝壽長遠四所。既隸荊州衛。其舊存成熟田地千二百頃十畝有奇。改照民田起科。雖非運產。究屬同衛運軍。亦令津貼。以重漕運。○又覆准。濟甯衛前後兩幫。臨清衛山東前幫。河南前後兩幫。東昌衛平山前後等幫。所有裁船減丁原設運田。均派歸該幫現運各丁。以勸運務。○十八年議准。運軍以屯為伍。按伍當差。給

田贍運。遇有裁減船隻。所減之糧。分派現船裝運。並將減船屯田。給現運以資贍費。○又題准浙江省温州衛。派給温州甯波紹興處州四衛幫丁屯田。於原定津貼外。上田每畝加津銀一錢。中田下田每畝各加五分。○二十二年定德州正左二衛屯地。徵條充餉。徵屯勦運一地兩徵。民力偏枯。將租銀概免徵收。於額徵屯糧銀三千五百七十三兩之內。每船給銀十兩。其餘什軍毋庸議給。○二十三年定屯田不得私相典賣。如有典賣。令照原價取贖。嗣後取贖屯田。

如原價在百兩以上者。令其分作三年交價。價足田即歸船。以資贍運。並將各省屯田已贖若干。未贖若干。造冊送部查覈。○二十四年議准直隸省通州左右兩所。坐落三河等州縣原額屯地。共一百九十四頃二十三畝三分五釐六毫。每畝原租銀自一分至一錢不等。議令每畝加增自三五六釐至一分三釐。一分五釐二分及三分五釐不等。天津幫左右兩所。坐落青縣滄州二州縣原額屯地八十四頃四十畝八分二釐。每畝原租銀自三分至六分不等。議令每

畝加增自五釐至一分不等。交地方官按年徵收關解該所。散給各軍。以資贍運。○又覆准山東省濟甯臨清二衛屯田。每畝津貼銀三分。東昌衛平山前後兩幫。無糧軍田。每畝津貼銀六分。有糧軍地及軍民自墾者。每畝津貼銀四分。○又議准蘇州前後太倉前後鎮海前後金山。滁州。蘇州。儀徵等幫裁減船隻所遺屯田悉歸現運。○二十五年議准江西省屯田。除南昌撫州。二衛所隨田地。基山塘堰。並袁州。贛州。屯塘。不徵餘租。又吉安所撥給龍軍五船屯田。自管。

收租贍運外。現在各衛所成熟屯田。官為分別徵租。每畝自二分至三錢三分六釐不等。並米穀折銀。自三錢二分至五錢不等。按各衛幫餘租多寡。分給各軍。餘銀存公備用。南昌衛運丁。每船每運。給銀九十兩。袁州衛永新所安福所。建昌所饒州所運丁。每船每運。給銀一百兩。贛州衛信豐所運丁。每船每運。給銀三百五十兩。鉛山所運丁。每船每運。給銀三百兩。會昌所運丁。每船每運。給銀三百一十兩。南安所運丁。每船每運。給銀一百四十兩。撫州所屯軍。每船每

運給銀一百二十兩。吉安所運丁。每船每運給銀六十兩。城軍每船每運給銀一百兩。廣信所運丁。每船每運給銀一百十九兩。弋陽貴溪二縣所轄船二隻。每船每運給銀二百兩。○又議有浙江省杭嘉湖三衛所屯田。俱係運軍自行管業。辦餉收租。其甯紹處衛嚴台。溫各衛幫屯田。均係輸津濟運。先經酌量加津。衢州屯田。以百畝六分九釐零為一單。共派運田百十六單六分。每單徵津銀五兩四錢二分六釐。議令加增銀二兩五錢七分四釐。每單合銀八兩。嚴州

屯田向無津銀。議令屯田每畝輸津四分。屯地每畝一分五釐。台州衛上田原徵津銀六分。議令加津四分。中田原徵津銀五分。議令加津三分。溫州衛上田原徵津銀五錢。議令加津二錢。中田原徵津銀三錢五分。議令加津一錢五分。下田原徵津銀二錢五分。議令加津一錢五分。每年衛所印官徵解道庫。給幫濟運。○又定建德縣原有撫州所屯田銀兩。東流縣原有南昌衛屯田銀兩。向係解江安道庫。該幫重運過江甯時。

就便給領。嗣後俱解江西省道庫。分給濟運。○
二十六年議准。湖南省荊州衛運田。按正餉銀
一兩。徵運費銀一兩四錢三分有奇。操田按正
餉銀一兩。徵運費銀一兩二錢一分九釐有奇。
赤丁八十名。按名派徵運費銀一兩七錢五分。
枝江。彝陵。長甯。遠安等四所。按正餉銀一兩。徵
運費銀三錢三釐五毫有奇。每運每船統給運
費銀一百六十兩。荊州左衛屯田。按正糧一石。
徵運費銀六錢四分六釐三毫有奇。每運每船
統給運費銀一百八十兩。荊州右衛運田。按正

餉銀一兩。徵運費銀一兩四錢一分九釐有奇。
操田。按正餉銀一兩。徵運費銀一兩二錢六分
八釐有奇。赤軍四百八十名。按名派徵運費銀
一兩三錢三分有奇。每運每船統給運費銀一
百六十兩。沔陽衛運班二田。按正餉銀一兩。徵
運費銀九錢五六分。至一兩七錢不等。赤丁每
名。徵運費銀二兩四錢。每運每船統給運費銀
一百二十兩。○又議准。荊州左衛屯田每正糧
一石。徵造費銀二兩一錢五分四釐有奇。每船
給造費銀六百兩。○又定。江西省清查屯田。令

經徽州縣將境內屯田另造清冊。以地從丁。於某丁名下註明某項田地若干。應徵餘租若干。其坐落坵段開明四至。造入交代。並分送該管上司衙門備查。各州縣按屯田民田分立界石。以垂永遠。軍民不得互相侵越。○二十九年議准。浙江省甯波紹興前後金衢所等幫裁減船隻所遺屯糧悉歸現運。○三十年題准。鳳陽衛屯田分為糧運二田。糧田每畝徵津銀一分。運田每畝照舊徵綱軍銀二分三釐不等。由衛徵收解道。給丁濟運。○又題准。揚州衛減船屯田。

由高郵寶應甘泉夫長四州縣徵收解道分給現丁濟運。○三十一年題准揚州衛頭幫屯田分別上中下三等。每畝上田徵津銀一錢二分。中田徵津銀八分。下田徵津銀四分。其柴租。豆租。銀租。不計畝數。豆每石定價一兩。柴每束三釐。銀。豆。柴。三項。每租銀一兩。徵津銀一錢六分。設有水旱。照正賦遞蠲。○三十二年題准建陽衛執業各戶。歲獲租籽。每戶貼給各丁銀四兩。旗丁自行取討。以勦運務。歷年以來。未能全數清給。而旗丁應領之行月。仍照舊代抵編賦。實

未平允。嗣後該衛屯餉改為隨田徵納。○又覆准鳳陽衛鳳中常州幫鳳中二幫網軍幫貼銀兩。向係官為徵收。惟網軍散處十數州縣。赴衛完納。跋涉艱苦。嗣後仍照舊例。聽旗丁自行收取辦運。○又定薊糧停運。東昌濮州。東平。裁汰船隻地畝。仍令各丁管種。東昌濮州。二幫。每畝徵津銀六分。東平幫。每畝徵津銀三分。由衛徵收。勻給現運。其裁汰德州。任城。二幫各丁。贍運銀兩。並濟甯前後等幫津租。移解直隸藩庫報部。○三十七年議准。河南省武平衛班軍。自康

熙十六年裁汰後。該衛屯田歸入江南亳州編徵者。軍兵改隸宿州二幫。僉差出運。仍徵津貼銀兩。其歸入河南睢州鹿邑柘城太康四州縣屯田。與民賦一體編徵。各丁亦俱改入民籍。既無僉差出運。亦無另議津貼。較之亳州裁衛軍田。苦樂不均。嗣後照亳州例。每畝加增贍運銀一釐七毫零。徵解總漕衙門。分給亳州現運宿州二幫運丁贍運。○三十八年奏准。湖北省襄陽衛。有掣留資役屯田二百九十四項零。掣留屯丁。向在鄖陽巡撫衙門充役。巡撫缺裁。又散歸

道府廳衙衙門充役。又有歸併竹山鄖均等衙所屯田八百六十頃零屯丁。於順治年開歸併襄陽衙以來。亦係撥歸各衙門充役。其田止完正賦。並不幫貼運費。此項屯丁。悉在額外當差。實係因循陋習。嗣後將屯丁充役之處。概行裁汰。仍按屯田科則徵收津費。○又覆准浙江省衢州嚴州屯田。較溫台等衙津租減少。將衢州本所改則田一千七百餘畝。加租穀四百石。折銀二百六十兩。派給甯波紹興處州三幫屯田。按單普加租穀三石。共三百四十九石八斗。折

銀二百二十七兩零。嚴州屯田每畝加津銀一錢一分九釐零。屯地每畝加津銀五分四釐零。○三十九年議准清查山東軍田。將濟甯衛之前後兩幫臨清衛之山東前幫河南前後兩幫軍田。無論什軍承種。與典賣之人承種。俱每畝收津銀五分。以四分五釐給本幫各船贍運。以五釐酌給無田無津之濟甯衛左右兩幫臨清山東後幫濟運。○又議准江南省典賣屯田。除安慶等衛各幫業經奏准借項回贖歸運。滁州等衛各屯田。現係運軍執業。新安等衛各屯運

田地均係舊有津貼。無事更張外。此外宣州衛
遠年典賣屯田。原定無論軍民執業。每畝津銀
五分六釐。議令每畝加津銀二分四釐。建陽衛
典出屯田。歷係民戶貼丁完賦。餘銀給丁收用。
議令每畝徵津一錢二分。鳳陽衛糧田屯田。舊
有津貼。毋庸再議。其正幫常州頭幫運田。每畝
津貼銀三分五釐零。前衛兩幫運田。每畝津貼
銀三分七釐。後衛三幫運田。每畝津貼銀二分。
以上三幫有典與民者。有閒丁自行執業者。議
令每畝加津銀二分五釐。以五釐貼補造船。餘

銀派給常州頭幫前衛二幫每船銀十兩。後衛三幫銀二十兩。又懷遠二幫運田每畝舊有津貼銀五分二釐。議令每畝增津銀一分五釐。中衛頭幫不分軍執民佃各丁自收津銀一分九釐。由衛徵津銀一分。議令加徵津銀一分。鎮江衛屯田一千七百餘頃。散處丹陽江都甘泉泰州。泰興。無論荒熟。每畝交租六斗。惟坐落泰州甘泉泰興等州縣屯田一百七十餘頃。田土稍薄。每畝減租一斗。實交本色米麥豆五斗。其坐落泰興縣之田土更薄者。減租二斗。實交本色

米麥豆四斗。其餘照舊輸納。長淮衛糧田。舊有津貼。毋庸再議。惟運田無論軍執民執。業戶貼津濟運。該衛三幫運田。每畝舊止津銀一分一釐零。議令每畝加津銀六釐八毫。四幫運田。舊止津銀八釐七毫。議令每畝加津銀七釐三毫。泗州衛屯田。向有津銀。毋庸再議。惟典出運田。向係旗丁自行收取。每錢糧一分。收至三四分不等。應按每錢糧一分。議令徵津二分五釐。江淮興武二衛。向無田產。較有田各幫。辦理竭蹶。將快丁歸併省衛屯田。照各州縣額徵糧賦。每

銀一兩。米一石。各徵津銀一錢。揚州衛二幫屯田。除各丁自行執業外。其減丁召佃所收租銀。每船津貼現運銀十五兩。又加租餘銀一千七百八兩。按船分派濟運。徐州衛屯運田。除運軍自行執業外。民人典賣及閒丁領種並衛田。每畝舊收津銀五分。議令加津銀二分。正衛閒丁執種田。向無津貼。議令每畝徵津二分。鎮海衛之金山幫。坐落上海縣二十四堡民典地畝。每畝徵銀五錢五分八釐。已經充裕。毋庸置議。其坐落南匯等縣軍民典賣並屯丁原墾地畝。議

令每畝津銀二錢。○四十年奏准。湖北省各衛屯田。自乾隆二十五年以後。典賣屯糧一千三百九十餘石。除額餉幫銀照舊完納外。仍令從重加津。將武昌左蘄州三衛。德安一所。按每糧一石。俱加津銀一兩三錢。黃州衛每石加津銀一兩二錢。襄陽衛屯地。每畝上則加津銀七分。中則四分。下則三分。隨同徵解。給丁濟運。○又議准。湖廣省各衛屯田典賣在民者。如本軍無力。許同伍之軍贖回。同船者即為同伍。各船者即為別伍。僅有典賣屯田者。不同船之軍丁取

贖。照民人從重加津之例。追給該衛各船資運。

○四十一年議准。屯坐湖南之岳州衛田少船多。屯丁貧疲日甚。查岳州衛民賦之田。有每畝輕糧一分以上至四五分者。應將岳州旱衛屯田。照民賦較輕之數。減半量加津費。通計屯田九千九百六十三頃七十三畝有奇。共應徵幫銀九千三百九十四兩零。分派岳州衛贍運。每畝照議幫之數。給銀一百二十兩。○又議准。湖南省岳州衛軍丁。已得旱衛幫貼。一切運造等事。毋許牽涉旱衛屯丁。○又議准。江南省徐州

衛籍隸湖北省之什軍。每戶津貼費銀自七八錢至四五六兩不等。共津銀一千六百八兩。永為定額。每年官為徵收。解交淮安府庫。給丁濟運。○四十二年議准。荊州衛屯田。坐落監利縣車灣地方。因窆築月隄。開除地一頃七十餘畝。應將運費銀四兩三錢零。一體豁除。按照三十船均勻攤減。每船歲給銀一百五十九兩八錢六分六釐。○四十三年議准。荊州衛軍丁。自首開墾屯田一頃五十二畝一分八釐。應徵運費銀三兩七錢一分九釐。以三十三船攤派。每

船計增給銀一錢一分零。並原給銀一百五十九兩八錢六分六釐。統計每船歲給運費銀一百五十九兩九錢八分。○四十五年議准。鳳陽後衛三幫津銀。原因該衛運田綱軍津貼銀二百五十六兩零。以二十四船分派。每船止得銀十兩零。較之正衛頭幫前衛二幫。每船支津銀二十五兩。及二十三兩者。多寡不均。是以於此三幫新加津銀內酌撥。現查出後衛三幫綱津除由衛徵收外。仍有各丁未報銀四百五十餘兩。各丁自行徵收。是所得津銀。本與正衛頭前

衛二兩幫不甚參差。若再將該兩幫屯田新加
綱津撥給。則是所支銀兩。反多於該二幫之數。
應將新舊津銀。各歸各幫支領。○四十八年奏
准。江淮興武二衛出運漕船。向無贍運屯田。又
無津貼銀兩。應將秦州等處入官地畝。派給江
淮原頭原二。及江淮七。興武三等極疲之幫承
買。永為贍運公產。其所估價銀四萬四千五百
九十五兩四錢零。自四十九年為始。分作四年
解司。仍隨時查察。如有私行典賣情事。照例治
罪。○五十年

諭江西省屯田應徵餘租酌減額數從前辦理屯田餘租因地土瘠薄疲丁不能完納積欠甚多勢不得不為減額而不籌款抵補又恐有礙濟運濟造之費著將兵米折色加增二錢是否價值尚輕於民無礙及此外有無款項可以抵補之處妥議具奏欽此遵

旨覆奏德安等州縣酌減餘租銀一萬五千三百二十餘兩仍在兵米折色款內加增共計銀一萬五千八百九十餘兩抵補乾隆四十八年應行加增之項於五十年帶徵四十九年應加之項於五十一年帶徵分年完解其每年加增兵米折

色。除抵補減額餘租外。尚餘銀五百六十餘兩。
解儲道庫充公奉

旨。此事以該處兵米折色之有餘。即抵補餘租減額之
不足。並非加賦。而於丁有益。於民無累。事屬可行。其
中餘出銀五百六十餘兩。不可解貯道庫充公。仍著
按畝除去。以加增之折色。抵補減額之軍費。閭閻益
覺寬紓。用示朕惠愛黎元之至意。○五十二年議准。
廬州衛頭二三幫。典出屯田一千五百一十一
頃。擇典出上則之田。抽贖租四百餘石。以資贍
運。共需抽出屯田四百四頃零。計租四萬四千

九百九十一石零。每贖租一石。折給庫平紋銀一兩三錢五分。實共需贖價銀六萬七百三十八兩。於江安糧道庫內漕倉減存項下動借。官為取贖。贖回之田。按各丁應得頃畝數目。給予管業。俟贖回後。即於次年起。將所收田租。先儘庫項。分作六年繳還。仍令該道衛實力稽查。此次贖回之後。儻仍有私相典賣。軍民照例治罪。道衛嚴叅究處。至未經取贖屯田一千一百餘頃。責令有力殷丁。隨時取贖。以符原額。○五十七年議准。湖北省武左衛班軍報墾新淤屯田。

四頃二十四畝一分四釐零該糧三十八石一
斗七升三合一勺每糧一石加增幫銀五錢共
增幫銀一十九兩八分七釐自五十五年為始
入額徵解濟運黃州衛下則屯地一頃六十六
畝三分八毫零因濱臨大江逐衛坍塌其應完
幫運費銀自五十六年為始一併豁免○五十
八年議准揚州衛頭幫軍丁典出屯田二萬九
千八百四十四畝四分四釐銀錢租田租銀三
千一百六十七兩七錢九分四釐麥豆租四千
二百一十七石二斗六升三合柴田三十畝秫

租田十石五升。按租給價。官為贖取。共需贖價銀七萬一千五百四十四兩六分二釐。於江安道庫漕倉等項銀內借給。俟贖回後。即於次年。起。將所收租價。分作六年歸款。儻仍有私相典賣情弊。軍民治罪。道衛叅處。至原議典戶津貼運銀四百餘兩。免其輸納。○五十九年議准。湖南省荆州衛枝彝長遠。四所軍丁。糧賦甚輕。運費更少。既無別項差徭。又未改歸民籍。若一體僉運。素於漕務不諳。原定徵銀六百六十兩。幫補荆州衛軍丁。銀數較少。照岳州旱衛加津之

例。再加津銀二千六百四十兩。以濟漕運。每年共徵新舊津貼銀三千三百兩。按照田畝上中下牽算。每畝徵銀二分六釐。蠲緩之年。不准並停。所徵銀兩。除歲給運費及大造給費外。其餘銀存儲道庫。為調劑幫務之用。○嘉慶三年議准。杭嚴衛生落餘杭縣屯田四千一十五畝。七分六釐八毫。酌定租額。按上則每畝折收錢五百二十文。中則每畝折收錢四百七十文。下則每畝折收錢三百五十文。仍於每畝聽給佃戶修塘錢七十文。不論年歲豐歉。照額清納。不許

帶欠。官為徵解。給丁濟運。○四年議奏。贍運屯田。每船每丁派田若干。每年例扣某某款項若干。及應支某某款項若干。刊刻易知由單。給發運丁親領。並將屯田老冊造交各衛。以備僉丁查驗。奉

旨。旗丁每年應得租籽。刊刻木榜曉諭。其應領款項。亦刊刻由單給發運丁。及照造老冊一分。發交各衛查驗。其原冊改歸糧道收管。著有漕督撫一體遵辦。○五年奏准。江淮興武二衛。向無贍運屯田。嗣後凡有入官沙洲田地。歸二衛承領濟運。○二十

三年覆准。新安衛出典屯田。不論軍民執業。輕則田。每畝原額津銀八分外。加徵津銀九分。新墾田。每畝原額津銀八分外。加徵津銀八分。和州屯田。無論軍執民執。每畝科徵銀二分二釐零。內除江興二衛土著運丁現執屯田。不增徵津貼外。其餘民快執產。應徵銀米。均勻攤增。每銀一兩。米一石。各增津銀三錢九分六釐零。含山縣屯田。無分快執民執。以原編銀米數目攤派。每畝科徵銀一分四釐四毫零。該二州縣增津銀兩。由道覈計完欠。如遇災緩之年。即於減

存銀內墊給。按限徵收還款。○二十四年奏准。廬州衛頭二三幫三次贖回屯田共九百餘頃。永遠隨船。以資運費。儻仍有私相典賣情弊。軍民治罪。該道衛等一併嚴叅究處。未贖屯田六百頃。仍令有力殷丁。隨時取贖。以符原額。○道光二年覆准。興武四幫旗丁。繳價承買江都縣境內新漲之裕興洲。劃給執業。以資濟運。○三年奏准。江南省葦蕩右營草地。向係撥給大河衛旗丁墾種。名為衛灘。內由各丁自種膏腴地二百七十八頃九十三畝零。其餘五百餘頃。由

廟灣營遊擊經管衛丁。歲得租錢二千五百串。嗣因柴質草細。不適工用。自是年為始。將衛灘地畝。仍歸大河衛旗丁領墾。其地租即令衛丁完納。○又奏准。湖北省屯田五千五百四十六頃五十八畝零。額徵津租銀三萬六千一百九十七兩零。內武昌衛應徵屯坐宜城襄陽鍾祥棗陽四縣軍屯錢糧銀一千八百九十四兩二分八釐。改歸該四縣就近徵解。又武左衛屯坐京山縣屯糧津租銀五百一兩一錢五分二釐。歸京山縣徵解。又蘄州衛屯坐江西德化瑞昌

二縣民佃租課銀九百一十八兩二錢五分六釐一毫。歸德化、瑞昌二縣徵解。餘皆歸各衛徵收。○同治二年定。各省屯田津租。有歸衛所徵收者。有歸州縣徵收者。現在江浙衛官。既已議裁。此項屯租。應統歸屯坐之各州縣管理。仍照徵收正項錢糧。年清年款。題報覈銷。其各衛旗丁。亦即改隸州縣。仍存屯籍之名。以便他日河運責其供役。至此項屯租銀兩。向係給丁濟運。目下河運暫停。令各該糧道另款存儲報撥。○五年奏准。江蘇省蘇州、太倉、鎮海、三衛及金山

幫應徵屯田月糧米一萬四百一石零。又丹徒縣應徵屯米一百七十四石零。此項屯田錯雜民田之內。徵米科則均在五升以上。甚至二三斗以上。重則十居其九。此時蘇省民田漕額。早經覈減定案。而各衛屯田皆與民田相連。未便仍令完重則。仿照常鎮二屬漕糧。普減十分之一。自本年冬漕為始。即按減定數目徵收。如有帶欠。即照短徵正項錢糧之例。分別開叅。所徵銀兩。除奏明提充海運經費。及例撥京口兵米外。下餘之數。造報候撥。○又議准浙江省衛嚴

溫台四衛所地瘠佃疲兵燹之後益難照額徵完所有衛嚴二所屯田津租按例額銀數以八折覈減溫台二衛以七折覈減自同治五年冬漕為始以減贖之數著為定額永遠革除折減名目按現定之數逐年徵收所徵銀兩除每年奏明提充海運外下餘之數造冊候撥○七年奏准嗣後衛所經徵運費銀兩均按照定額徵收不得任意增減如有私自折徵或私立名目即行從嚴叅辦加等治罪○八年覆准浙江省甯波紹興處州海甯各衛所奏准裁汰所有甯

波衛每年額解糧道衙門餘租銀十二兩八錢
三分三釐。責令屯坐之鄞縣經徵完解。如有清
屯勸墾各事宜。亦令該縣就近兼辦。其紹興處
州。海甯三衛所。每年額徵餉租。並屯丁銀兩。及
清屯勸墾各事宜。即責成嘉湖衛辦理。○光緒
九年奏准。蘇浙漕糧不藉丁運。所有江蘇金山
幫屯租津貼。及浙江餘杭縣屯租。均應停給。歸
入漕項款內解部。